

115 年全國語文競賽臺中市複賽臺灣原住民族語言朗讀文章 【鄒語】 國中學生組 編號 2 號

na la hia eaa eoskũ ta cou

upena hola na'nosi cocoeconũ ta fuengu ho eafou 'e cou a'toana,
at'inghi la maezo kaebũ uhto matotoaphoyũ ho ea makokos'ozã ho ea
yoskũ,

mo mav'ov'o 'o la hia ea yoskũ ta cou a'toana, maito toalungu,
maaseu, toteezo, mahfuyo, hoci eno o'te otfo.

iho la toalungu, mo atva'esi umnũ homo ngoecungcũ 'o chumu to
toaphoyũ, lasi e'cũcũhi to chumu 'o lasi peela ana to mayoyoskũ, homo
maica, la na'no si tipolo, iho mo o'te fozu 'o chumu, la meelũ titho to
mapopo'oyoi hoci eno kos'ozã ho teai topana.

homo mũchũ, honci himeu 'o chumu to toaphoyũ, tac'u mahto yoi ho
e'ohũ maaseu, ho la maaseu la bumemeala aiti 'o chumu ho
asngũcũ biu'i'io, la sokoeva honci akameosũ esmi na feoho.

la na'nosi titeezo homo tufngi, i'o teezo la boemi to meemeeno ho poa
maenoa, tena seoteuyuna ho futa ho cũngheni to eoecũnghũ, tenac'u peelũ
titha. i'o teezo la yaeza na'no titha hola otfo ho mamtesngusngu,
micu kakutia nala meelũ titho maitan'e.

honci otfo, la ahoi meia otofnana, tena hafa uhne c'oeha ho tec'u otfo,

la ahoza yomzeni to fatu ho t'oz'oz'i 'o otofnana ho aasvũta tfui to chumu,
honci'ũ ahoi hafũ 'o yoskũ, tec'u meelũ ma'eayoskũ,

ne noana'o, o'a la 'aũnpũpũ otfo, lac'o yonto iachi nuu ci va'hũ honci
otfo, atinghi, honci toehunga esvũta tamo cono you tee toehunga aũt'ũca 'e
tophoyũ, la na'nosi tomtueha. la meoino eemo'a honci aha'o yũh'ũtũ, ko'ko
la acũhũ tmaayaezoyũ 'o cou .

iho tac'u noc'ũhũ no hiesi no esvũta, la asvũta nate ayoca ci otfnana,
tena hafa uhto c'oeha, la ahoi yausiesi ho topeohũ 'o mamameoi, tac'u
meelũ ahoi ea yoskũ, panto la atfũgũ a'pũ'pũyũ ho lemahafo to la yaa ci
yoskũ, la pahteteuyuna to tena yoni aangae, la avahvoh'una 'omo
maamtanũ ho i'omo 'o'okosi, tena ieni to hia botngonũ tomo
macoconoemoo ho ahmũmũska aangaeza.

'a moeno maica , la toehunga aũt'ũca 'e toaphoyũ ho acũha ta'upi to
yoskũ 'e mo macicihi ho isicu tov'oha, ko'ko la acũhũ tmaayaezoyũ 'e cou.

鄒族的捕魚

鄒族是狩獵的民族，但也喜歡捕捉魚蝦。特別喜歡到河裡捕魚的族人，大家會稱這個人「像水獺一樣」。捕魚的方式有釣魚、網魚、刺魚、竭澤捕魚或毒魚等等，各自都有要注意的地方，以前還有部落會約定在某時期禁止到河川捕捉魚蝦，通常是三年，如果有人違反約定，將會受到嚴厲的責罰。

大家一起保護河川魚蝦，也將保育成果公平分配給每一個人，因而建立了特有的鄒族河川文化。